

# INUIT ATAQATIGIIT

## Inatsisartuni



09.01.2019

UPA2019/110

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Tugtupitsi nunatsinni pinnersaasiassatut pisortatigoortumik nunatta ujaraatut toqqarneqarnissaanik kiisalu pilersaarummik aammalu avammut niuernermit ussasaarusiornissamut periusissiamik UPA 2020-imut saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Inuit Kalaallit Nunaanni najugaqavissut ujaqqanik pinnersaasiassanik suliaqarnerminni aningaasaqarnerisa siuarsarneqarnissaat matumani suliniuteqarnermi siunertarineqarpoq.**

(Múte Bourup Egede, Inuit Ataqatigiit)

### **Tunngavilersuut:**

Nunatsinni nunaqavissut ujaqqanik pinnersaasiassanik inuussutissarsiuteqarnermik inerisaanerat ukiuni makkunani malunnarsiartorpoq. Nunatsinni inuussutissarsiut nutaatut taaneqarsinnaasoq periarfissanik aningaasarsiornermillu siuariartornissatsinnut iluaqutaalluarsinnaasoq pitsaasunik toqqammavissaqartittariaqarparput.

Nunat allat ujaqqanik pinnersaasiassanik avammut niueruteqarnermik inerisaasimanerat ilinniarfigilluarsinnaavarput soorunami nunatsinnut tulluussarlugu. Ilinniarfigisinnaasatta ilagaat Tanzaniami pinnersaasiassap Tanzanit-ip Tugtupit-itut immikkuullarissuseqartutut taaneqarsinnaasup nunami tassani inerisarneqarlualuni misilittagaqarfigineqarluni aningaasarsiutaallualersimanera.

Tugtupit-ip immikkuullarissuunera nunatsinnilu kisimi taamak pitsaassuseqarluni nassaasaanera atorluagassaarput. Pingaartumik maanna nunani tamalaani Tugtupit-imut soqutiginninnerup qaffakkiartuaapiloornera pinnersaasiortortatta malugisaat periarfissatut isigisariaqarparput.

Ujaqqanik pinnersaasiortortatta oqariartuutigisarpaat Tugtupit pisortatigoortumik nunatta ujaraatut toqqarneqarsinnaappat nunatsininni najugaqartut avammut niuernissaminni iluaqutigisussaallugu aamma akitigut. Taassumalu saniatigut Tanzanit-ituulli immikkuullarissuuneranik taamaallaallu nunatsinniit nassaasaaneranik niuerutiginnissaanut nittarsaassinissamut suliaqarnissaq aamma aningaasarsiutaallualernissaanut toqqammavissiissasoq oqaatigisarlu. Tugtupit-ip pisortatigoortumik nunatta ujaraatut toqqarneqarneratigut annikitsumik aatsitassarsiornissamut akuersissuteqartunut ataasiakkaanut nunattalu ujaqqanik pinnersaasiassanik nunatta

pisuussuteqarneranut nittarsaanneranut iluaqutaassaaq, ujaqqanimmi pinneraasiassanik inuussutissarsiutip aallunneqarnerani nittarsaassisarneq inuussutissarsiutip iluatsinnissaanut attuumassuteqarmat.

Niuernikkut aningaasarsiornikkullu assigiinngisitaartumik tamatigoornerusumillu anguiniagaqarnermi periarfissaq una inerisarniartigu. Nunatsinni nunaqavissut taamaaliornitsigut suli annerusumik kivitseqataajumanerat periarfissilluarlugu.

Angusaqarfissarsiortumik oqallinnissaq qilanaaraara.

**Pisortanut aningaasatigut allaffissornikkullu kingunerisassai:**

Periusissiorneq ilisimasalinnillu tusarniaaneq A/C fuldmægtigip ukiumut akissarsiaasa iluanni suliarineqarsinnaanera naapertuussorineqarpoq, tassa 50.0000. koruunit missaannik nalileqartoq. Matumani naqiterneq saqqummiunneqarnera nutserneqarneralu ilaareerluni.

**Namminersortunut aningaasaatigut allaffissornikkullu kingunerisassai:**

Soqanngilaq

**Innuttaasunut aningaasatigut allaffissornikkullu kingunerisassai:**

Soqanngilaq